



O'ZBEKISTON RESPUBLIKASI
SUV XO'JALIGI VAZIRLIGI
BUYRUQ

2022-yil "26" iyul

Toshkent sh.

147-sonli

**O'zbekiston Respublikasi
Prezidentining 2022-yil
14-iyundagi PF-154-sonli
Farmoni ijrosini
ta'minlash to'g'risida**

O'zbekiston Respublikasi Prezidentining 2022-yil 14-iyundagi "Davlat organlari va tashkilotlari faoliyatining ochiqlik darajasini oshirish va baholash tizimini joriy etish chora-tadbirlari to'g'risida"gi PF-154-sonli Farmoni ijrosini, shuningdek, vazirlik va tizim tashkilotlari faoliyatining ochiqligi, shaffofligi va hisobdorligini ta'minlash, Ochiqlik indeksini hisoblashda yaxshi natijalar qayd etilishiga erishish maqsadida

BUYURAMAN:

1. O'zbekiston Respublikasi Prezidentining 2022-yil 14-iyundagi PF-154-son Farmoni ***rahbarlik va ijro uchun qabul qilinsin.***

2. Mazkur Farmon bilan:

2022-yil 1-avgustdan boshlab Davlat budjeti, shuningdek, xalqaro moliya institutlari mablag'lari hisobidan moliyalashtiriladigan loyihalar, shu jumladan istiqbolli investitsiya va infratuzilma loyihalari bo'yicha ularning asosiy texnik ko'rsatkichlari va boshqa loyiha hujjatlari to'g'risidagi ma'lumotlar Ochiq ma'lumotlar sifatida joylashtirilishi kerak bo'lgan ijtimoiy ahamiyatga molik ma'lumotlar ro'yxatiga kiritilishi;

davlat hokimiyati va boshqaruvi organlari, shuningdek, ustav fondida (ustav kapitalida) davlat ulushi 50 foiz va undan ortiq bo'lgan xo'jalik jamiyatlari hamda davlat unitar korxonalarida ochiqlik bo'yicha amalga oshirilayotgan ishlarning samaradorligi va natijadorligini baholashga qaratilgan Ochiqlik indeksi joriy etilishi;

Ochiqlik indeksi 8 ta indikator asosida "0" balldan "100" ballgacha baholanib, davlat organlari va tashkilotlarining faoliyati samaradorligi **"yashil"**, **"sariq"** va **"qizil"** toifalarga ajratilishi;

baholash har yili oldingi yilning 1-yanvaridan 31-dekabrigha qadar bo'lgan davrni o'z ichiga qamrab olishi;

2022-yilda Ochiqlik indeksi 1-iyuldan boshlab joriy yilning ikkinchi yarmi qamrab olingan davr uchun baholanishi;

Ochiqlik indeksini hisoblash natijalari har yili 1-aprelga qadar Korrupsiyaga qarshi kurashish agentligi tomonidan "eanticor.uz" elektron platformasi va ommaviy axborot vositalarida e'lon qilib borilishi;

baholash natijalari e'lon qilingach, bir oy muddatda faoliyati "qizil" toifada baholangan davlat organlari va tashkilotlari rahbarlarining ochiqlik sohasida yo'l qo'ygan kamchiliklari va ularni bartaraf etish bo'yicha rejalashtirgan chora-tadbirlari yuzasidan Hukumat tizimidagi davlat organlari va tashkilotlari rahbarlarining axboroti Vazirlar Mahkamasi Rayosati majlislarida eshitisilishi;

Hukumat tizimiga kirmaydigan tashkilotlar rahbarlarining axboroti Oliy Majlis Senati majlislarida eshitisilishi hamda natijasiga ko'ra tegishli choralarda belgilanishi ***ma'lumot va ijro uchun qabul qilinsin.***

3. Suv xo'jaligi vazirligi tizimida ochiqlikni ta'minlash sohasida amalga oshirilayotgan ishlarining samaradorligi va natijadorligiga mas'ul Ishchi guruhi tarkibi ***Ilovaga muvofiq tasdiqlansin.***

4. *Ishchi guruhi (A.Nazarov):*

har chorakda vazirlik va uning tizimidagi tashkilotlar tomonidan ochiqlikni ta'minlash sohasida amalga oshirilgan ishlar, rejalashtirilgan loyihalar va chora-tadbirlar ijrosini muhokama qilib borish;

tahlillar va keng jamoatchilik fikrini o'rganish asosida ochiq e'lon qilinishi lozim bo'lgan ma'lumotlar ko'lamini kengaytirish, sifatini oshirish va dolzarbligini ta'minlash bo'yicha takliflar ishlab chiqish hamda ularni amalga oshirish chora-tadbirlarini belgilash;

vazirlik va uning tizimidagi tashkilotlarning ochiqlikni ta'minlash borasidagi yangi loyihalarini ko'rib chiqish va ularni amalga oshirish yuzasidan amaliy yordam ko'rsatish;

vazirlik va uning tizimidagi tashkilotlarning o'z rasmiy veb-saytida joylashtirilishi majburiy bo'lgan ijtimoiy ahamiyatga molik ma'lumotlarning namunaviy shakllarini ishlab chiqish;

Ochiq ma'lumotlar sifatida joylashtirilishi kerak bo'lgan ijtimoiy ahamiyatga molik ma'lumotlar belgilangan muddatlarda rasmiy veb-saytda va Ochiq ma'lumotlar portalida joylashtirilishini ta'minlasin.

5. Qoraqalpog'iston Respublikasi Suv xo'jaligi vaziri, viloyatlar irrigatsiya tizimlari havza boshqarmasi boshliqlariga:

bir hafta muddatda hududiy tarkibiy tuzilmalarda ochiqlikni ta'minlashga doir normativ-huquqiy hujjatlarning ijro etilishi xatlovdan o'tkazilsin;

bir oy muddatda hududiy tarkibiy tuzilmalarning rasmiy veb-sayti tashkil etilib, unda ochiq ma'lumotlar uchun alohida bo'lim ochilsin;

Ochiq ma'lumotlar bo'limiga ochiq ma'lumotlar sifatida joylashtirilishi kerak bo'lgan ijtimoiy ahamiyatga molik ma'lumotlar belgilangan muddatlarda joylashtirilishi va yangilab borilishi ta'minlansin.

6. Farmon talablaridan kelib chiqib, vazirlik va uning tizim tashkilotlari faoliyati "yashil" toifada baholanadigan bo'lsa, ochiqlikni ta'minlashga mas'ul bo'lgan xodimlar Korrupsiyaga qarshi kurashish agentligining tavsiyasiga asosan budget mablag'lari va qonunchilikda taqiqlanmagan boshqa manbalar hisobidan bir yilda bir marta bir oylik lavozim maoshining 50 foizi miqdorida rag'batlantirilishiga ruxsat berilsin.

7. Vazirlik va uning tizim tashkilotlari faoliyati “qizil” toifada baholanadigan bo‘lsa, ochiqlikni ta’minlashga mas’ul bo‘lgan xodimlar olti oy davomida rag‘batlantirish va mukofot pullaridan mahrum qilinishi barobarida ular bilan tuzilgan mehnat shartnomasini bekor qilishgacha bo‘lgan choralar ko‘rilishi e’tiborga olinsin.

8. Mazkur buyruqning ijrosini nazorat qilishni o‘z zimnamda qoldiraman.

Vazir



Sh.Xamrayev

**Suv xo'jaligi vazirligi tizimida ochiqlikni ta'minlash sohasida amalga
oshirilayotgan ishlarning samaradorligi va natijadorligiga mas'ul
Ishchi guruhi
TARKIBI**

1. A.Nazarov - Vazirning birinchi o'rinbosari, Ishchi guruh rahbari
2. A.Mirzayev - Vazir o'rinbosari, Ishchi guruh rahbari o'rinbosari
3. R.Qarshiyev - Vazir o'rinbosari
4. D.Xodjiaxmedov - Vazir o'rinbosari
5. X.Umirzakov - Ichki audit va komplayens nazorat boshqarmasi boshlig'i
6. R.Sharopov - Yuridik boshqarma boshlig'i
7. Sh.Suyunov - Axborot xizmati boshlig'i
8. S.Alimardanov - Moliyalashtirish, buxgalteriya hisobi va hisoboti boshqarmasi boshlig'i
9. X.Lapasov - Kadrlar va ta'lim muassasalari boshqarmasi boshlig'i
10. D.Ro'zimurodov - Davlat-xususiy sheriklik va raqamli texnologiyalarni rivojlantirish boshqarmasi boshlig'i o'rinbosari
11. O.Norbekov - Axborot xizmati bosh mutaxassisi

Izoh: Mazkur topshiriqning ijrosini ta'minlashda Ishchi guruh tarkibidan kimningdir lavozimi o'zgarganda yoki ishdan ozod qilinsa, lavozim bo'yicha ularning o'rniga tayinlangan shaxs ijrosini ta'minlaydi.